

DIARIO Hubentud den movecion

Buki di mucha Curasonchi a drenta scol na Merca






ORANJESTAD (AAN)/DORAL, FL — DIARIO a haya un tremendo noticia. Ta asina cu Curasonchi ta un buki di mucha multilingual crea pa artistanan Rosabelle Illes (Aruba) y Levi Silvanie (Curaçao). E storia ta sigui e aventura di un curason cu no kier ta djis un simpel curason. En buskeda di algo mas valioso, Curasonchi ta dicidi di bay keiro rond di e curpa pa experencia con bida lo tawata si e mes tawata algo otro, manera un wowo, nanishi, boca, horea, man y pia. Durante su aventura, Curasonchi ta siña hopi, pero e les mas grandi ta bin ora e ta haya sa con importante un curason chikito den un mundo grandi ta.

Despues di a ricibi caluroso acogida na Aruba

((2018) y Curaçao (2019), Curasonchi a keda invita pa bishita Doral, Florida, cu ta un Sister City di Aruba. E miembronan di Oranjestad Aruba Sister Cities Association (OASCA) a introduci Curasonchi na e scol di 5 estrea, Downtown Doral Charter Elementary School, cu mesora a incorpora e buki den nan programa. E curriculum coach di e scol, sra. Paloma Martinez a expresa cu e mensahe di e storia a toca su curason. E hecho cu e buki ya caba ta traduci na Ingles y Spaño a hacie posibel pa forma parti di e programa academico como cu e scol ta duna les na tres idioma: Ingles, Spaño y Portugues. E docente di Portugues, sra. Ana Paula Bastos, a nota e similaridadnan entre

Papiamento y Portugues y a expresa su deseo di mira Curasonchi traduci na Portugues tambe.

Durante e simannan prome cu dia di San Valentino, tur 1e klas a trata e storia y cada un a crea un proyecto relaciona cu e tema di e buki. Algun a pinta nan propio curason, otro a explora e parti mas miho di nan mes y algun a crea nan mesun buki di Curasonchi. Remarcabel tawata cu algun klas a explora e origen di Curasonchi y asina a pinta e mapa y bandera di Aruba despues di a siña mas tocante e isla. Riba 14 di februari, e muchanan a keda sorpresa cu un bishita special di Curasonchi cu a pasa den cada klas pa asina presencia e presentacionnan di e muchanan. Sra.



Joyce Aguila, cabesante di Downtown Doral Charter Elementary School, a expresa su satisfaccion pa cu e proyecto aki, felicitando e autornan y enfocando riba e conexcion profundo entre e storia di Curasonchi y e balornan cu tur estudiante ta wordo siña cada dia pa asina nan crece bira Global Leaders den comunidad.

Recientemente un video a keda estrena riba Cura-

sonchi su medianan social, documentando su bishita completo na Florida. E evento aki ta forma e prome paso di Curasonchi su desaroyo den Estados Unidos. Pa mas informacion tocante e proyecto aki bishita www.heartythebook.com y pa sigui Curasonchi mas di cerca like Hearty riba Facebook y follow @heartythebook riba Instagram.